

序

祀汾阴之岁，臣隶职霜台，作句稽之吏。

越明年秋，以鞠狱无状，谪掾于宁海。

冬十月，会圣祖天尊降延恩殿，而真宗皇帝亲奉灵仪，躬承宝训，启绵鸿于帝系，濬清发于仙源。

诞告万邦，凝休百世。

于是天子锐意于至教矣。

在先时，尽以秘阁道书、太清宝蕴太清宝蕴：指太清宫唐写本《道藏》。

出降于余杭郡，俾知郡故枢密直学士戚纶、漕运使今翰林学士陈尧佐，选道士冲素大师朱益谦、冯德之等，专其修较，俾成藏而进之。

然其纲条漶漫，部分参差，与《琼纲》、《玉纬》之目舛谬不同。

岁月坐迁，科条未究。适纶等上言，以臣承乏，委属其绩。

时故相司徒王钦若总统其事，亦误以臣为可使之。

又明年冬，就除臣著作佐郎，俾专其事。

臣于时尽得所降到道书，并续取到苏州旧《道藏》经本千余卷，越州、台州旧《道藏》经本亦各千余卷，及朝廷续降到福建等州道书，《明使摩尼经》等，与诸道士依三洞纲条、四部录略，品详科格，商较异同，以铨次之，仅能成藏，都卢四千五百六十五卷，起千字文“天”字为函目，终于“官”字号，得四百六十六字。

且题曰：《大宋天宫宝藏》。

距天禧三年春，写录成七藏以进之。

臣涉道日浅，丁时幸深，诂期尘土之踪，坐忝神仙之职？蛙跳缺瓮，积迷虀蟹之区；蚋泊浮滓，但局醯鸡之覆。虽年栖暮景，而宝重分阴。

于是精究三乘，详观四辅，采摭机要，属类于文。

探晨灯虹映之微，综玉佩金珰之说。

泥丸、赤子、九宫，爰系于一方；神室、婴儿、百道，皆根于两半。

至如三奔三景之妙，九变十化之精，各探其门，互称要妙。

刻舟求剑，体貌何殊？待兔守株，旨意宁远。因兹探讨，遂就编联，掇云笈七部之英，略宝蕴诸子之奥，总为百二十卷，事仅万条。

习之可以阶云汉之游，览之可以极天人之际。考核类例，尽着指归，上以酬真宗皇帝委遇之恩；次以备皇帝陛下乙夜之览；下以稗文馆校讎之职，外此而往，少畅玄风耳。

臣君房谨序

🕒版本号 #2

★由 上清持伟 创建于 8 十月 2022 10:21:25

🔪由 上清持伟 更新于 8 十月 2022 10:23:30